

Namminersorlutik Oqartussat suliffeqarfiutaasa nammineertitat naatsorsuusiortarnerat pillugu Namminersorlutik Oqartussat nalunaarutaat nr. 24, 22. december 2017

Inatsisartut inatsisaanni nr. 26 novembarip 28-anni 2016-imeersumi kommunit Namminersorlutillu Oqartussat missingersuutatt naatsorsuutaallu pillugit § 36 naapertorlugu makku aalajangersarneqarput:

Kapitali 1

Atuuffia

§ 1. Nalunaarut manna Namminersorlutik Oqartussat suliffeqarfiutaannut nammineertitanut ukununga taamaallaat atuuppoq Nukissiorfiit, Mittarfeqarfiit aamma Asiaq.

Imm. 2. Imm. 1-imi suliffeqarfiit taaneqartut ukiumoortumik naatsorsuusiortarnerminni Nunatta Karsiata aningaasaqarnermut ukiua malissavaat.

Kapitali 2

Ukiumoortumik naatsorsuusiortarneq pillugu inatsisimmi aalajangersakkat atortarneri

§ 2. Nukissiorfiit Kalaallit Nunaanni ukiumoortumik naatsorsuusiortarneq pillugu inatsit pillugu peqqussut qaqugukkulluunniit atuuttoq naapertorlugu Sanaartukkat innaallagissamut sakkortuumut atugassat atortullu innaallagiatortut pillugit Inatsisartut peqqussutaat nr. 12, 3. november 1994-imeersumi aammalu Nukissamik pilersuineq pillugu Inatsisartut peqqussutaat nr. 14, 6. november 1997-imeersumi malittarisassat malillugit inuiaqatigiit isiginiarlugit suliffeqarfik Namminersorlutik Oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 3. Mittarfeqarfiit Kalaallit Nunaanni ukiumoortumik naatsorsuusiortarneq pillugu inatsit pillugu peqqussut qaqugukkulluunniit atuuttoq naapertorlugu inuiaqatigiit isiginiarlugit suliffeqarfik Namminersorlutik Oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 4. Asiaq Kalaallit Nunaanni ukiumoortumik naatsorsuusiortarneq pillugu inatsit pillugu peqqussummi qaqugukkulluunniit atuuttumi inuiaqatigiit isiginiarlugit suliffeqarfik Namminersorlutik oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 5. §§ 2-4 naapertorlugit naatsorsuusiortarnermut malittarisassani nikingassutit ukiumoortumik nalunaarusiani naatsorsuusiortarsip atorneqartup ataani allanneqartassapput.

Kapitali 3

§ 6. Ukiumoortumik nalunaarusiat Nunap Karsiata naatsorsuutaannut ilaapput.

Imm. 2. Naalackersuisoqarfiup suliassaqaqarfinnik akisussaasup ukiumoortumik nalunaarut Aningaasaqarnermut Akileraartarnermullu Naalackersuisoqarfimmut nassiuttassavai.

Imm. 3. Ukiumoortumik nalunaarusiaq taassumaluunniit ilaa Naalackersuisunut saqqummiunneqarsimatinnagit avammut saqqummiunneqartassanngillat.

Imm. 4. Ukiumoortumik nalunaarusiaq Inatsisartunut Nunap Karsiata ukiumut aningaasaqarfiusumut pineqartumut naatsorsuutaat ilanngullugit akuerineqarnissaat siunertaralugu Inatsisartunut saqqummiunneqartassapput.

§ 7. Suliffeqarfik ukiumoortumik nalunaarusiaq tamarmiutillugu saqqummiuppagu, tamanna kukkunersiorneqaranni ilusaat oqaasertaalu atorlugit kukkunersiuinermilu oqaaseqaatit ilanngullugit pissaaq.

Imm. 2. Ukiumoortumik nalunaarusiaq ilaannakortumik saqqummiunnerani, ukiumoortumik nalunaarusiaq naalisarneqarnikoq avammut saqqummiussinermi ersarissumik allaqqassaaq. Kukkunersiuinermi oqaaseqaatit avammut saqqummiussinermi naalisarlugit ilanngunneqartariaqanngillat, kukkunersiuisorli nangaassuteqarsimanersoq avammut saqqummiussinermi ersarissumik allaqqassaaq.

Kapitali 4

Kukkunersuineq

§ 8. Ukiumoortumik naatsorsuutit kukkunersiuisumit naalagaaffimmit akuerisaasumit Inatsisartunit toqqarneqartumit nunap karsiata naatsorsuutaanik kukkunersiuisumit kukkunersiorneqassapput.

Imm. 2. Kukkunersuisup tamat kukkunersuinermit ileqqugisartagaat naapertorlugit ukiumoortumik naatsorsuutit kukkunersiorneqassavai, tassungalu ilanngullugu suliffeqarfiup naatsorsuusiornermit atortui taakkulu imarisaat allat isornartorsiuilluni misissussallugit.

Imm. 3. Kukkunersuisoq pissutsinik sulinermini ilisimalikkaminik pisortanilu ilaasortat suliffeqarfimmut, Nunap Karsianut, akiitsoqarfinnut sulisunulluunniit kalluaasumik taarsiisussaataaffigilersinnaasaminnik pillarneqaatigisinnaasaminnilluunniit iliuseqarsimanerannik iliuseqarsimannginnerinnilluunniit tunngavissaqartumik ilimasuuteqarnerminik immikkut paasissutissiisassaaq.

Imm. 4. Kukkunersuisup Inatsisartut piumasaqaataat inatsisinut imaluunniit kukkunersiuinermit ileqqorissaarnermut akerliunngippata malissavai.

§ 9. Suliffeqarfimmi pisortat paasissutissat suliffeqarfimmik taassumalu ukiumoortumik nalunaarusiaanik naliliinermit pingaaruteqartutut isigineqarsinnaasut kukkunersiuisumut paasissutissiisutigisassavaat.

Imm. 2. Suliffeqarfimmi pisortat kukkunersuisup pisariaqartutut isigisaanik misissuisinnaatissavaa, isumagissallugulu kukkunersuisup paasissutissanik pissarsinissaa kukkunersuisullu suliaminik ingerlatsinerminut pingaaruteqartutut isigisaanik ikiussallugu.

Imm. 3. Suliffeqarfinni pisortat kukkunersiuinermit allattuivik atsiornermikkut akuerissavaat.

§ 10. Kukkuñersiuineq naamassereerpat, kukkuñersiuisup ukiumoortumik nalunaarusiamik kukkuñersiuisimanini tamassumunngalu pisariaqartunik iliuuseqarsimanini naatsorsuutitut oqaaseqaateqarnermigut uppersarsassavai.

§ 11. Kukkuñersiuisoq Inatsisartut atugassaannik kukkuñersiuinermi allattuvimmut allattuisassaaq.

§ 12. Kukkuñersiuisoq sulisuilu suliffeqarfiup naatsorsuutai pissutsillu allat pillugit susassaqanngisunut paasissutissiisassanngilaq.

Kapitali 5

Atuutilersitsineq

§ 13. Nalunaarut ulloq 1. januar 2018-imi atuutilersinneqarpoq, takujulli imm. 2.

Imm. 2. § 3-mi aalajangersagaq ulloq 1. januar 2019 atuutilersinneqarpoq

Imm. 3. Namminersornerullutik Oqartussat suliffeqarfiutaasa namminersortitat naatsorsuuseriveqarnerat il.il. pillugit Namminersornerullutik Oqartussat nalunaarutaat nr. 25, 26. november 1998-imeersoq 1. januar 2018-imi atuutilersumik suliffeqarfinnut § 2-mi aamma § 4-mi taaneqartunut atuukkunnaarpoq.

Imm. 4. Namminersornerullutik Oqartussat suliffeqarfiutaasa namminersortitat naatsorsuuseriveqarnerat il.il. pillugit Namminersornerullutik Oqartussat nalunaarutaat nr. 25, 26. november 1998-imeersoq ulloq 1. januar 2019 atorunnaarsinneqarpoq.

Namminersorlutik Oqartussat ulloq 22. december 2017.

Aqqaluaq B. Egede

/

Nikolai S. Christensen